

P. VERGILI MARONIS

GEORGICON

LIBER II

HACTENVVS aruorum cultus et sidera caeli;  
nunc te, Bacche, canam, nec non siluestria tecum  
uirgulta et prolem tarde crescentis oliuae.  
huc, pater o Lenaeae: tuis hic omnia plena  
muneribus, tibi pampineo grauidus autumnno 5  
floret ager, spumat plenis uindemia labris;  
huc, pater o Lenaeae, ueni, nudataque musto  
tinge nouo mecum dereptis crura coturnis.

Principio arboribus uaria est natura creandis.  
namque aliae nullis hominum cogentibus ipsae 10  
sponte sua ueniunt camposque et flumina late  
curua tenent, ut molle siler lentaeque genistae,  
populus et glauca canentia fronde salicta;  
pars autem posito surgunt de semine, ut altae  
castanaeae, nemorumque Ioui quae maxima frondet 15  
aesculus, atque habitae Graeis oracula quercus.  
pullulat ab radice aliis densissima silua,  
ut cerasis ulmisque; etiam Parnasia laurus  
parua sub ingenti matris se subicit umbra.  
hos natura modos primum dedit, his genus omne 20  
siluarum fruticumque uiret nemorumque sacrorum.  
sunt alii, quos ipse uia sibi repperit usus:  
hic plantas tenero abscindens de corpore matrum  
deposuit sulcis, hic stirpes obruit aruo,  
quadrifidasque sudes et acuto robore uallos. 25  
siluarumque aliae pressos propaginis arcus